



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 7

Sumit Nagal-i Rome Challenger asayamung kokogo

Iraq nung America nungger kajia tali lir: Khamenei



VOL. XX NO. 198 (ADOK 198) DIMAPUR TENTONÜ (MONDAY) MONUPII (MAY) 01, 2023 ₹ 5.00

Nagaland nung Ex-Servicemen-i OROP meshir

Kohima, April 30, 2023 (TYO): Linük nung aliba jawan tem den külemi All Nagaland Ex-Servicemen Committee of Honorary Captains, Army nung commissioned & non-commissioned officers aser tanga ranks-i One Rank One Pension (OROP) takhangba agütsüogo.

Iba dak sendakba nung All Nagaland Ex-Servicemen Committee Honorary Captains (HCOs), Junior Commissioned Officers (JCOs), Non-Commissioned Officers (NCOs) and Other Ranks (Ors)-i Prime Minister aser Union Defence Minister dangi züluba shidi ka Raj Bhavan Kohima nung agütsü.

November 14, 2022 nü linük nung Ex-Servicemen meyrjang aika Jantar Mantar nung adenshi aser iba sentong nung 24 unions nungi züngsemtem aden. February 20, 2023 nunga 50,000 jawans aser 87 jawan union Jantar Mantar nung adenshia OROP atema takhangba agüja liasü.

December 23, 2022 nung Centre sorkari colour service inyakba sepaitem aser July 1, 2014 matongdang premature retirement asürtem nem dang OROP agütsüsü aser July 1, 2014 sülen premature retirement asürtem nembo magütsüsü ta metetdaksü, ta Nagaland nung Ex-Servicemen-i züluba shidi nung shia lir.

Jawan kati kodanga premature retirement mangur kechiyong parnok indang agreement mesüra bond ji küm 52 atema lir. Külen officers' agreement ya küm 58 atema lir aser office kati küm 58 majungdang retirement agira iba dangji premature retirement ta ajar, ta shidi nungsa shia lir.

"Jawan ajak nem One Rank One Pension tajanzük

agütsüsü" ta parnokisa ashi. Army sepaitem küm 32 nungi 40 tashi nung tashiyim agi pension agidaksür saka army officers-i küm 52 nungi 60 tashi maneni inyaker anunggi army officers nem OROP magütsüsü ta parnokisa shidi nung shia lir.

OROP ya July 1, 2014 nungi tenzük aser iba nungi sen agütsüba 60% nungi 70% tashi army officers nem agütsü. Ajisüaka, Indian Army nung officers ya 3% dang aser soldiers 97% lir, ta Nagaland nung Ex-Servicemen temi ashi.

Lanur sepai ka indang maximum service ji küm 17 lir aser jawan ka arishi küm 18 nung mapa inyaksü tenzük küm 35 nung pension angur, saka army officer ka arishi küm 55 nungi 60 tashi nung ang pension angur. OROP ya soldiers atema lir saka army office temi tajanzük tulu agir ta parnokisa ashi.

Army nung mapa tajung inyakba tenüng nung akhümtsüba agütsüba Honorary Naik, Honorary Havildar, Honorary Naik Subedar, Honorary Subedar, Honorary Subedar Major, Honorary Lieutenant, Honorary Captain, Naik Subedar, Subedar, Subedar Major ranks indang pension nung poisa ka danga metutsü, saka OROP angutsü temeten maliba officers nem OROP kübok tajanzük aika agütsür, ta parnoki metetdaksü.

"Kedangsür nem tim mesüi OROP agütsüba anentsüla aser tesüba nung parnok nem agütsüba OROP den sen tetemlokji Government treasury nem meypa agütsüsü akhanger" ta parnokisa ashi.

All Nagaland Ex-Servicemen Committee-isa disability pension atema takhangba agütsüogo.

Raj Bhavan nung Mann Ki Baat 100th Episode sayu



April 30, 2023 nü Raj Bhavan, Kohima nung Prime Minister Narendra Modi indang Mann Ki Baat sentong reprangba angur.

Kohima, April 30, 2023 (TYO): April 30, 2023 nü Raj Bhavan, Kohima nung Prime Minister indang Mann Ki Baat 100th Episode sayua liasü.

Iba sentong nung Information & Public Relations and Soil & Water Conservation Advisor Imkong L. Imchen-i tongti tesemdang ama shilem agi.

"Prime Minister Narendra Modi-i Mann Ki Baat indang 100th episode nung jembiba ya India nungger atema benjung balaka kümogo aser iba ajanga nübertemi shilem agiba benjungteper" ta Advisor Imkong-i ashi.

Mann Ki Baat indang episode shia balaka liasü aser tatishitsü tasen aika dena liasü. Iba sentong ya tangartem nungi angazükba mapa ka liasü aser Prime Minister-i nübertem den sendakteptsü atema lenmang lapoktsür ta paissa ashi.

Tanü sentong nung Modi-i telephone ajanga loktiliba nung

shilem tajung agirtem den jembiba liasü.

Prime Minister Modi-i tourism ajungkettsü atema nübertem dang pei state adena orr tourist destinations 15 semdangtsü ayongzük.

Modi-isa UNESCO Director General Audrey Azoulay indang osang lemsatop.

Tanü Raj Bhavan, Kohima nung agiba sentong nung Secretary to Governor, Rajesh Soundararajan, IAS-i Governor indang osang zünga metetdaksü.

Prime Minister-i ita shia Mann Ki Baat sentong agir aser iba ajanga linük nung sensotem den anogoshia sorkar ketdangsa aotsüba indang olemteper, ta Governor La Ganesan-i ashi.

Mann Ki Baat sentong ajanga nübertem dangi welfare schemes aser policies bener aoer aser item osang sangoktsür. Covid-19 wara mapang Prime Minister-i iba sabang kanga amshioigo aser nübertem dang wara indang

osang tejangja metetdaksü ta pa ashi.

Maan Ki Baat nung PM Modi-i Nagaland nungi NCC cadet ka den o jembioigo. Ano PM-isa Lidi Kro-u society nungi Lidi Kro-u society ajanga Naga traditional arts & crafts wazüka ayuba atema tenünsang agütsü. Maneni tarutsü anogotem Maan Ki Baat nung Nagaland nungi nisungtem tetshitsü imlar ta Governor Ganesan-isa ashi.

Iba sentong nung Assistant Director, PIB, Sonukumar Singh Konjengbam, IIS-i tesentepertem pelaa agizük aser Assistant Director, PIB, Sonukumar Singh Konjengbam, IIS-i anküp tepela o jembi.

Mann Ki Baat indang 100th episode nungtem nung Central Bureau of Communication, Kohima-i exhibition ka sayua liasü.

PM Modi indang Mann Ki Baat ya October 3, 2014 nü mezüng tenzük liasü.

Kaketshirtemi NLTP Act atema o atsütepa jembi

Kohima, April 30, 2023 (TYO): Kaketshirtemi tang mezüng atema Nagaland Liquor Total Prohibition (NLTP) Act indang o atsütepa jembidang iba Act agientsü asoshi jembirtemi takok angu.

April 28 nungi 30 tashi Angami Students' Union (ASU) indang 30 buba biennial general conference amongba anogo tanabuba nung "Is it time to lift NLTP Act" ta ser o atsütepa.

Iba tetoktepa nung ASU kübok tzükong pezü- Chakhroma, Northern, Southern aser Western nungi kaketshir ananai shilem agi aser tetendangertemji Kohima Press Club president Alice Yhoshü, Sovima Village Council Chairman Sebastian Zuvü aser Nagaland Olympic Association (NOA) Joint Secretary Neivikuolie Nicholas Khatsu nungger liasü.

O atsütepa jembirtemi motion nungi Seyievinuo Mere (Northern ASU), Zhapuchütuo Ruvieo (Chakhroma SU), Ketouneikho Yavio (Western ASU) & Mhathozho Khizho (Southern ASU) aser against nungi Mhashevil Ltu (CSU) as team leader, Rokosielie Nakhro

(WASU), Keneihiezo Mere (NASU) aser Batsonü Kweho (SASU) nungger liasü.

Iba tetoktepa nung motion tejembirtemi 600 nungi 425 marks aser against jembirtemi 378 angu.

NLTP Act yanglur 'dry state' ta süaka Nagaland kübok kinükkisang ajaklen yi angur, saka iba nung yi tamajung den jenjang tasak lir. Iba Act aliba ajanga state sorkari kümshia Rs 200 crore tema revenue nung akoksar. Ano 1989 nung yi noktanga sülen yi jemer nisung teimba süogo, ta motion jembirtemi ashi.

NLTP Act ajanga miima yi yanglua ayoker aser Naga national workers kar dena syndicate tenteta lir. Anunggi tanü sorkari tajanzük maliba Act ya agientsüla ta parnokisa ashi.

O jembirtemisa state aser linük kar nung yi noktanga saka takoksa tuluba bentsür aruba ajanga tenokdangba agienba indang tatishitsütem bener arua jembi.

Külen, against jembirtemi Act ya tali akangshitsü aser sorkari akangkanga mapa inyaksü indang ashi.

Nagaland nung civil societies aser NGOs-ia sorkar den yaritepa yi noktangtsüla, ta parnoki ashi.

Christian state ka ama Act ya magientsüla kechiyong Laishiba nung yi agi leta ajemba indang mashir saka meimchir taküm ya Tsüngrem tenla ki anunggi meshiteta ayutsü indang shia lir, ta o jembirtemi ashi.

Arogoi sorkar nem yi noktangdaksü kechiyong Naga nunggeri talitabong ajem aser tashidak aika adokba den loktiliba aser kibongtem nung khuret balala bentsür aru. Ano yi jemertem ozüng alema mapa inyaksangshia liasü ta parnoki ashi.

Yi shishilembaba ajanga revenue anguba dang nungibo meimchir taküm tongtipangba, ta parnokisa shisem.

Naga nungger dak aziükba tashi mali aser yi jemra talila ajemer aser iba jagi Nagaland nung Act benoka lir aser iba ya magientsüla ta parnokisa metetdaksü.

Tanü tetoktepa nung SASU nungi Mhathozho Khizho (for the motion)-i mezüngbuba jenjang aser SASU nungisa Batsonü Kweho (against the motion)-i tanabuba jenjang takoktem angu.

OFFICE OF THE
AO STUDENTS' CONFERENCE (AKM)
H.Q. Mokokchung - 798601 : Nagaland
Regd. No. Rs. 3072
"For the Nation"

Ref. No. AKM/SCS/PR-01/2023 Date. 30-04-2023.....

MOATSÜ TEPELA SALEM

Aoli tekong troksanger senso ajak dangi Ao Kaketshir Mungdang mendenti nungi 2023 Moatsü benjongmung salem tulu abener.

Asen Ao kin asoshi tamaren nungjatet benjongmung tulutiba iba Moatsü nung ya metsüngshiareta mungdi. Ongpanglu, azünglu ajak renema tsünüsempanga yur Anungtsüngba, Longkitsüngba dang temoatsü jazukba ya asen Ao kini kanga metsüngareta munga aru. Tanüa iba benjong tulutiba asen teyanglur Tsüngrem dang temoatsü jazüka mungdi arung ta Ao Kaketshir Mungdang (AKM) mendenti ajanga ayongzük.

Ano koba asen tebuti Ao Sendeni Monupii 1-2, 2023 anogotem nung Moatsü benjongmung sentong tulu ayongzük lir yangji nübertem ajaki lungsoa denti ta ayongzüksemer.

Lanutoshi Aier
President
AKM

Imnayachet Mollier
Social & Culture Secretary
AKM

Bikee Dutta-i Mister Dimapur 2023 jenjang ajangtet



Dimapur, Rongchii/April 30 (TYO): Tetso College, Dimapur nung aliba Lorin Hall nung 3 buba Mister Dimapur 2023 tetoktepba nung Unity College nungi Bikee Dutta-i takok nua liasü.

Iba tenünga atema nisung 17 toktepa liasü aser parnok ya round asem - ethnic wear, designer aser formal agia liasü.

Iba sentong ya Meraki Entertainment Nagaland ajanga Achievers Academy den lungjemer ayongzüka liasü.

Mister Dimapur 2023 nung takok angur nisung asem 13 buba Mega Mister Northeast nung toktepsü, koba region nung tulutiba alitsü.

Mister Dimapur 2023 tetoktepba nung 1st Runner Up ya Pongennok aser 2nd Runner Up ya Thushi Jr nati

nguteta liasü. Takok angur par asem ya Instudia IT institute nungi sen 10,000 jenjang Diploma course agütsütsü.

Taküm iba tetoktepba nung title sponsor ya EDUVERSITY liasü aser 1st aser 2nd runner up title ya Lisu Care aser Kino World liasü. Trophy ya IWSN Training Centre ajanga sponsor süa liasü.

Iba tetoktepba nung tetendanger ya Jason Prakash, CEO, EDUVERSITY; Enyuh Phom, vice president, Meraki Entertainment; Esther Imsong, Director, Marcofed, Govt. of Nagaland, Alem Jamir, Educator and Teacher's Trainer aser Vihuzo Kense, Mister Kohima aser Mister Northeast 2023 liasü.

Iba tetoktepba nung sub-title angurtemji Thushi Jr - Mister

Popularity, Imtiniba Kichu - Mister Multimedia, Pongennok - Best Ethnic Wear aser Bikee Dutta - Mister Personality alitsü.

Iba sentong ya Zaren Ngullie aser Imnasenla Racheal nati host asü aser Akokla Langu, Cosplay player, Kings Generation aser Wapang Jamir nungeri finale nung shilem agia liasü.

Iba tetoktepba nung designer ya Benwang Newmai liasü aser tetokteper tem make-up ya Vish Makeover aser Torechii Jane aser hairstylish ya Nito Aye liasü.

Iba sentong nung Mister Altitude World India, Tonoto Zhimomi-i choreograph süa liasü aser Ralan Patton, Joliba Sangtam, Bashing Nyam aser Lisebi Sangtam nungertem contestant manager liasü.

Moatsü Festival 2023
Date: 1st - 3rd MAY

Celebrating our Roots

Organized by Ao Senden
A collective celebration initiated by the
Government of Nagaland

MOATSÜ YATINÜ SENTONG

Anogo : Monupii 2, 2023
Mapang : Anepdang 11 Ako
Tesentepdak : Imkongmeren Sports Complex Mokokchung

Tejaoker Khutong : Wb. Neiphu Rio
Hon'ble Chief Minister, Govt. of Nagaland

Tetushi Tejaoker : Wb. Metsübu
Minister RD & SIRD, Govt. of Nagaland.

O Mejir : Wb. Bendangtemsü & Kr. Limasenla Jamir

Sentong Tarsenca

- Sentong lenir : Wb. Limalenden Longkumer
- Sarasademtsü : Rev. Ponen Longchar, Pastor MTBA
- Pela agizükba : Wb. Chubawati Longchar, President, Ao Senden.
- Moatsü ratet : Wb. Lanutemsü DB
- Tzükong Yartsüngsang Toktep-I:
- Tetushi Tejaoker O :
- Sobaliba ken : Rionsanger Putu Menden, Mokokchung Yim
- Moatsü salem (Greetings) 5 mts each:
i. Shri Vezuhu Keyho President, Chakhesang Public Organisation
ii. Shri Nunganglemba President, Chang Khulie Setshang
iii. Shri Nikheto Zhimomi President, Sumi Hoho
- Tzükong Yartsüngsang Toktep-II:
- Ar atsütepba Takoker Toktep (Final)
- Moatsü ken : Watsü Mungdang
- Tejaoker Khutong O :
- Senpet agütsüba mapang:

MOATSÜ BENJUNG MONG
Lapakba Sentong

Anogo : Monupii 1, 2023
Mapang : Anepdang 10 Ako
Tesentepdak : Imkongmeren Sports Complex Mokokchung

Tejaoker Khutong : Wb. Tongpang Ozükum
Advisor Water Resources, Govt. of Nagaland

O Mejir : Wb. Bendangtemsü & Kr. Limasenla Jamir

Sentong Tarsenca

- Sentong lenir : Wb. Sashimeren
- Sarasademtsü : Wb. Kikum Longkumer, Pastor, Kumlong Baptist Arogo
- Pela agizükba : Wb. R. Ayim Longkumer, Tongror.
- Moatsü ken : Jangpetkong Senso Telungjem Mokokchung Town
- Moatsü Salem (Greetings) 5 minutes : Shri Shashank Pratap Singh IAS Deputy Commissioner, Mokokchung
- Tejaoker Khutong O :
- Inter-ward Lisapur asaya toktepa mapang:
Ketdangsür : MTAT & AWUMT mendenpurtem.
Asaya telemsa :
i. Ar atsütepba (Tug-of-war)
ii. Süngkümi tutepba (Pole climbing)
iii. Jui asemtepa (Bamboo stilt walk)
- Senpet agütsüba mapang:

MOATSÜ MUNGZÜKNÜ

Anogo : Monupii 3, 2023
Mapang : Anepdang 10 Ako
Tesentepdak : Aor Kilem Mokokchung

MOATSÜ 2023

Wish you a Happy Moatsü 2023

Süngratsü yimtak Multi-Utility Outdoor Stadium lapok

Mokokchung, Rongchii/April 30 (TYO): Tanu Süngratsü yimtak Impur lenjem anasa Multi-Utility Outdoor Stadium Astir. Imtiwapang Ex.MLA kinüngtsü Wt. Keihungle-i lapoktsüogo.

Süngratsü lima nung Süngratsü Sports Complex ka yanglutsü asoshi 2000 küm Süngratsü Senso Mungdang akaba mapang nung pangzüng renema ayu, iba sülen ibaji yanglutsü asoshi Süngratsü Putu Menden aser temelungertemi tenla bendena agütsüba sen Rs.20,39,000 agi acahayangertemi iba Süngratsü Sports Complex-ji yangluteta 2011 küm taoba MLA Nungsangyapang-i lapokja liasü.

Iba sülen ano iba Multi-Utility Outdoor Stadium jenjang nung ajungketa yanglushitsü asoshi Asür. Imtiwapang Ex.MLA-I achayanga North Eastern Council ajanga RMSA sentong kübok yanglutsü renem ta iba mapatong nung achayanger osang agütsüdang achayanger Luden tenung nung Wb. Nungsangbenla Longchar ajanga metetdaksü.

Tanu iba sentong nung Asür. Imtiwapang Ex.MLA kinüngtsü Wt. Keihungle-i iba stadium lapoktsür kelen mapang tatsüka agia jembiba pei tasoyim lushi nung iba Multi-Utility Outdoor Stadium yanglutsüba ya la kinüngboi kanga dang jangraba mapa ka liasü, aser mapang shia kinüngboi iba Stadium akaba ajanga tarutsü putu asoshi süngjang atangtsüta la dang ashiba lemsatöp.

Wt. Keihungle-isa iba Multi-Utility Outdoor Stadium küma meyanglutetba mapang Süngratsü Sports Complex ka yanglutsü asoshi tangar teyari magi-i pei nüburi dang tenla aguja inyaktetbaji takok tuluka lir, iba Süngratsü Sports Complex yangluteta akaba ajanga tanu iba Multi-Utility Outdoor Stadium lapokteter, anungji tarutsü nunga nübur tejakleni anitetsü asoshi iba ama mapatong maneni inyakangta adenshia aliba nüburtem ayongzüka ashi.

Sentong nung Süngratsü Senso Mungdang Tir. Wb. Lemasashi Ozukum, aser Wb. C. Wati Walling Convener, Tourism & Ground Committee parnokia shilem agia jembiba den Süngratsü Baptist Arogo Pastor Wb. I. Kilen Longchar ajanga iba tesem meshiteta sarasadem.

Karnataka nungbo 'Operation Lotus' takok mangutsü: MB Patil

Babaleshwar, April 30 (Agencies): Karnataka assembly election nung Congress-i assembly menden 224 nungi menden 130 nung takok angutsü aser election sülen BJP-i MLA tem anidenba 'Operation Kamala' tangbo takok mangutsü, ta Congress lenir aser taoba mapang minister M B Patil-i ashi.

Osangbener den jembidang Congress campaign committee chairman Patil-isa, Congress party telung nung mangatettep adoka mali, ta metetdaksü.

Taoba mapang Home aser Water resources minister Patil-i, BJP nungi Lingayat lenir Jagadish Shettar aser Laxman Savadi nati Congress nung adenba sülen party nung pa tezülen sendokogo ta jembiba osangji tiyazü, ta ashi.

Patil-i Vijayapura district kübok Babaleshwar menden nungi tokteptsü.

"Tangbo parnoki 'Operation Kamala' agiyonga tamakok angutsü. Sorkar akümtsüsa BJP aser JD(S) na senteper menden peria mangutsü. JD(S) teyari agiyonga kecha masütsü, kechiyong Congress-i menden 130 angutsü," ta pai ashi.

2018 küm BJP-i Lingayat lenir, B S Yediyurappa Chief Minister candidate shima liasü, ajisüaka iba mapang nungji parnoki menden 115-a mangu, ta pai ashi.

"Tangbo Yediyurappa mali, anungji BJP kijai sorkar akümtsüji tamakoktsü. Parnoki 'Operation Kamala' ajanga ozi MLA 17 alizükba ajanga dang sorkar aküm. Parnoki MLA shia dak sen crore noklang kaka (100) indoka liasü. Sen ajak senteper crore 1700 indok," ta paisa metetdaksü.

BJP lenir ana Congress nung adenba sülen Patil tezülen sendokogo, ta jembiba dak sendakba nung pai, "Yamaji asübo ni Jagadish Shettar dang party nung adentsü majungshila. Ni Congress lenir tain ka lir anungji ni party nung tongtibang. Shettar-i Congress nung adenbaji ni ajanga lir, ta party-i meteta dang lir. Party-i sorkar akümtsüla, aser ibaji tongtibangtiba," ta ashi.

Chief minister menden rakteper aika aliba ajanga party telung nung mangatettep adoka lir ta jembiba dak sendakba nung Patil-i, "Yamaji kecha mali. Nisung ajak pei tejangraba lir aser iba nungji kecha tai mali. BJP lenirtembo pei tejangraba mali asü?," ta asüngdang.

CM menden atema Siddaramaiah, D K Shivakumar aser M Mallikarjun Kharge nunger dang masü saka iba menden atema tetemsü lenir aika lir, ajisüaka Congress bangdaki dang telemtetba agitsü, ta pai metetdaksü.

Punjab nung gas leak asüba lendong nung nisung 11 asü



April 30, 2023 nü Punjab kübok Ludhiana district nung gas leak asüba tesem nung National Disaster Response Force (NDRF) aser police adenshia aliba noksa nung angur. Iba tatalokba nung nisung 11 süogo.

Ludhiana, April 30 (Agencies): Amongnü Punjab nung Ludhiana kübok Giaspura kiyong nung gas tamajung leak asüba tatalokba nung nisung 11 asü aser nisung pezü hospital nung treatment agidar, ta ketdangsertemi metetdaksü.

Ludhiana Deputy Commissioner, Surabhi Malik-i, kilentzü aodak telung nungi chemical kar methane den meyoaktepa leak asütsüa akok, ta metetdaksü.

DC-isa, iba tesem nungjagi nisungtem aienshidaksüogo aser maneni tesem ulushia nisung aienshidaksütsü, ta metetdaksü.

"Onoki kilentzü aodak telungi

aiba tesemtem nungi samples bendentsü. Chemical kar methane den meyoaktepa asütsüa akok, ta onoki bilemer," ta lai metetdaksü.

"Iba tatalokba nung asürtem dak tangu sashiba tsütsü timtemba temaitsü maliasü. Neurotoxin ajanga parnok asü asütsüa akok," ta laisa shisem.

District administration-i, National Disaster Response Force (NDRF) team ka iba tesemji tonga ogo aser parnoki gas tapu kechiar jangjatsü, ta metetdaksü.

Police-i, iba tatalokba nung asürtemji tetsür pongu aser tebur trok liasü; asürtem rongnung tebur anabo arrshi

küm 10 aser 13 dang liasü, ta metetdaksü.

DC-i, district administration, police, municipal corporation aser Punjab Pollution Control Board nungi züngsemtem iba tesem jagi oa lir, ta metetdaksü.

Punjab Chief Minister, Bhagwant Mann-i, iba tatalokba osang angashia jashir, ta ashiba den külemi akokba tashi sorkari yaritepdar, ta metetdaksü.

Mann-i Punjabi oshi agi twitter ajanga, "Ludhiana kübok Giaspura kiyong nung gas leak asüba tatalokba osang angashia jashir. Police, district administration aser NDRF iba tesem jagi oa lir. Sorkari akokba tashi yaritepdar," ta metetdaksü.

King Charles semzükba sentong nung tatong Tir Dhankhar adentsü

New Delhi, April 30 (Agencies): Taruba ita United Kingdom nung King Charles III aser Queen Camilla na semzükba sentong nung India tenüng nung tatong Tir, Jagdeep Dhankhar adentsü, ta ketdangsertem osang ka ajanga metetdaksü.

1953 küm Queen Elizabeth II semzükba sentong nung India tenüng nung taoba mapang Ato kilonser, Jawaharlal Nehru dena liasü. Iba sülen küm 70 shi lir May 6 nü King Charles semzükba sentong agitsü.

Iba sentong nung adentsü atema UK-ibo India Tir, Droupadi Murmu jaok saka iba sentong nungji tatong tir,

Dhankhar ag adentsü.

Andrew Jamieson-i tejaokba shidiji design asü aser iba nungji akhidang British nunger tar nunger otsü nung tepen apongba mongpu aser yimsüsüba tasen ka tenzüksü atema tanaben soshiba temaitsü, Green Man noksa keta lir. Tejaokba shidi nungjisa temaitsü aketba naro balala aser British nunger arem naro aser arem shirurutem lir.

Tang mezüing Camilla dang 'queen' ta ajatsü.

King Charles III nem korang semtsüba sentong nungji British Ato kilonser, Rishi Sunak aser pa kinüngtsü, Akshata Murty na leniba nung UK wako amener

jajatsü.

Iba sentong ya Abbey Church of Westminster nung agitsü aser tejaoker 2,000 adentsü.

Ajisüaka Camilla-i Kohinoor Diamond keta aliba korang masemtsü, kechiyong Kohinoor Diamond indang mangatettep lir. Iba diamond ya bendangertemi India yimsüsüba mapang nung British nungeri bener ao.

Yaküm September ita nung Tir, Droupadi Murmu-i India tenüng nung Queen Elizabeth II nem akhüm agütsütsü atema London-i oa liasü. Queen Elizabeth II arrshi küm 96 nung asü.



April 30, 2023 nü New Delhi nung aliba BJP headquarters nung Defence Minister Rajnath Singh den BJP lenirtemi 100buba 'Mann Ki Baat' radio programme angadang tangokba noksa nung angur.

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

Appendix - IV-A
[See Proviso to rule 8 (6)]
KIOJEN AYOKTSÜ NOTICE

Securitization and Reconstruction of Financial Assets & Enforcement of Security Interest Act, 2002 read with proviso to Rule 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice agütsür.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsünglanglen shia aliba kiojen State Bank Of India nung Authorized Officer-i **28.06.2023** anogo nung agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" asütsü, 07.06.2019 anogo tashi nung Rs.1,98,47,742.00 (Rupees One Crores Ninety Eight Lakhs Forty Seven Thousand Seven Hundred and Forty Two only) alanzüksü atema kiojen agiogo, iba denji külemi sen tetemlok, cost, charges aser tanga teindokba balala adentsü aser ibaji M/s. I. K. Shohe Enterprise, Proprietor Shri I. K. Shohe aser Guarantor Smt. Vitoli Itho Shohe dang nungi secured creditor-i agitsü.

Reserve price ji **Rs. 2,98,00,000.00** aser earnest money deposit ji **Rs.29,80,000.00** asütsü.

Kiojen osang tongmelang agi
Property ID: **SBIN400009005203**
1) Block Thilixu Village, Mouza No.3, House No.271 Lane No.12, Dimapur, Nagaland nung Smt. Vitoli Itho Shohe tenüng nung aliba aser Dag No.F/5 Patta No.94 agi ayimjemba kimong 3 Bighas den RCC Building ana, Assam type Building ka, Boundary Walls aser yangji aliba construction ajak.

Bounded:
North tsütsülen : Approach Road, South tsütsülen : Shri Hevishe kimong,
East tsütsülen : Approach Road, West tsütsülen : Shri Nihovi kimong.
Iba sale atema telatbatem tejangja yangi angutsü- State Bank of India, secured Creditors website nung angutsü:
<https://sbi.co.in/web/sbi-in-the-news/auktion-notices/sarfaesi-and-others>
and https://ibapi.in/Sale_Info_Home.aspx

Date: 27.04.2023 Authorised Officer,
Place : JORHAT State Bank of India, SARB Jorhat

My Handloom My Pride

Welcome To **STATE HANDLOOM EXPO**

28th Apr to 11th May, 2023
10:00 AM TO 5:00 PM

at **Urban Haat,**
DIMAPUR, NAGALAND



TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 01, 2023

Entrepreneurship ya option masü!

Tanü iba yimobilem nung lemsatepba tebilemba ya ajaki melamelaa angatetsü atema English nung dang 'Entrepreneurship' aser 'Option' ta amshir, kechiyong asenoki teti intreprenurship ya government mapa mangurtem asoshi tanüngtalu mapa ka ama dang jembir. Ni aji manganer kechiyong intreprenurship ya option masü saka tajungtiba mapa lir. Tanü asen lima aser asenok taküm kibong inüseta mainba ya asenok nukla aser tejangraba ajunga agi mazünyonga government mapa tilakati ir ita sen tilaka chia alitsü aser züngtetra government mapa nung tular kuma alitsü ta bilemba ajanga lir. Ibai tashidak saka asenoki meputeter, anungji tashidak masü temoatsü amai rakteper. Asenok kolok nung iba tangatetbaji dang alinungji, asenoki alima nung ya nisung ka asoshi jenjang tematiba aser tajungtibaji government mapai ir ita sen chia aliba mapa yaa ta bilemer. Ibayongji, government mapa tilaka danga ngura yimkongi yimjak nung tenüngsang agütsür saka nisung kati yimkong ajangzüksüsa private nung peisasa entrepreneur, industrialist aser business nisung kuma takok ngua inyaktetba takok aser temoatsütembo mezüngshir. Ashi, nisung ka government ita sen chia alitsüsa government mapai itetba takok dang nungibo nisung kati tangar ishika nembo mapa agütsütetsüsa alu ka yimetba mesüra factory mesüra workshop ka lapoktetba takokjisa tuluba aser tajungba lir. Ajisüaka, tang tashibo asenok kolok nung "government service " aginüba tejangraba ya dang jangoka alinungji, asenok tulutiba nungi shir tilatiba tashi agi teti bangpetsa jembibaji, " joko asen lima nung government mapai aitsü lenmang mali kumogo, anungji government mapa dang mebushii peisasa inyaktetba mapa bushia entrepreneur akümtsü merangtsüla," ta ajungshitepba o ya ka asütsü. Ajisüaka, iba tajungshi o ya shitakba ajungshir masü saka lanurtem tezüdangdaksüba aser teimla samadaksüba o ka lir. Tetezü, asenoki nisung ka taküm aliba mezüng nukjidongji government ita sen chia alitsüba asoshi sotetba amai bilemer aser government mapa mangu nungang nübortem nungdakba langka kabosa yanglua agütsütetsüsa peisasa mapa kar bushiteta inyaka entrepreneur akümtsüla ta bilemer. Joko, asenok Aortem asoshi iba tangatetbaji meyipteptsüla aser peisasa nübortem nungdak reprangteta meinyaktetter, magütsütetter aser meyanglutetertem asoshi dang government mapaji yutsütsüla. Aji oda, Khristan akümba nung, zünga shia metetba nung aser government mapai aiba nung Aortem ya 'Pioneers' (samanirtem) asü süra, joko iba putu to süogo saka tangbo asenok asoshi 'pioneer' akümtsüba tesemji nübortem nungdakba agütsütetsü aser yanglutettsü asoshi peisasa mapa bushiteta 'entrepreneur' akümba tesemji asütsüla. Kodang asenoki asen lima nung poktetba rongsen ali nungi shir süngo tu tashi agi tagitsü kuma inyaktetba entrepreneurship nung samanir (pioneer) kümdir, tangar ajaki government service toktsür iba sülen anidaksü. Iba dangji lenir, lenisüba, leadership ta ajar. Tanü asenoki iba lenisübaji magütsütetba agi asenoka timatemer aser asenoki agütsütsü melen tangar meyong dena rakzuka agir. Ibai pioneer jakla aser tejangraba (pioneering character & spirit) masü saka alar jakla (slave mentality) lir. Iba alar jakla nung jagi asenok adoktsüla aser lenmang tasen piteta lenisüba tajung agütsütsüla. Joko, government service mangutsüji peisasa pei akok mapa bushia inyaksüla ta tebilema mebilemli aser tejembia mejembili. Ajisüaka, jet ta meyiper tangatetba tasen nung, government mapa nangdaka liaka, pei taküm nung pei kibur kümer peisasa inyaktetba agi pei ajangzükba dang masü saka nübortem nungdak dena agütsütetsüsa entrepreneur kumang ta ajungshitepdi. Entrepreneur akümtsübaji kecha tasak masü, mezüngbuba nung aseni kechi inyaksü jangrar? Tanabuba nung asenoki kechi inyaktetsü? Tasembuba nung (demand alitsüsa) nübortem asoshi kechi nungdaker? ta asüba nungdakji asenoki reprangtetra, entrepreneur akümtsüba tesemji aji lir. Alima nung chiyongtsü nungi shir computer tashi ya government ita sen achirtemi züsenteptba aser yanglutetbatem masü saka government mapa meinyaker entrepreneur-temi inyaktetbatem lir. Itemji anepalutsü atema government-i kilirtem (government servants) shimer. Atangji, asenok ya shitakba samanir kinsa südi asünungbo kilir asütsüba jenjang dang nungibo kibur asütsüba jenjang shimtsüla. Atangji, kilir dang nungibo kibur shisa tebuluba aser khuret tuluba aser mapaa teimba asütsü. Iba jagi joko 'Pioneer' mesüner asü?

OLEMSABANG

ASEN TSÜRABUR AMA ALU MERANGA AYIMTSÜ TENZUKDI

~ L. Kika Pongener.

Asenok ya tsürabur mapang nungi alu meranga yimer küm nungi küm renteta tepok sunga chiyunga-jema lia aruba kin lir. Alu meranga ayimba agi tangar dak memetaloki chiyunga-jema lia aruba chirtem aser semchirtem asenok lir. Ano karbo alu meranga ayimba kisung agi takar kümer 'Su chia' yimer nem shijok-tuja, yimpoksu agüja chiyungdaksüba aser maka-maiter nema tsükdem agüja chiyungdakja lia aruba kin lir. Akhi putu nung 'Putu Menden' nung yimsusur tata-tainertem-jia teimba ka tsük chen ana-asem sunga tokoka yur shinga daka memetaloki chiyunga-jema aruba kin lir. Akhidang asen tsüraburtem jang-otsü nungi shir moko-mersu, aonsotsü ajunga pei lu nungi parnok peribo zulenteta chiyunga-jema aru. Anungji tzuma lima nung metsü aser sungo, itemla kar aliba dak alaka kecha tebilemstü mekai lia aru. Ajisuaka, tanü asenok tia asadanga reprangdangra, Assam lima aser jila balala nung jangpong yur alir teimba lir. Assam nungeri ita pongu-terok ka lenmang mokdang nungbo asen Naga nungerbo aya agi ajak sumatsüba jenjang nung teimba lir. Asenoki asenok lia aruba jenjang ya khen jungjunga shisadangra, oboula-bo sujak/langdem demer tola masem (Half Naked) ser aluyima liasü, ano obala tia ka-a Yisu yimsu agizukba agi 'Ponin Tola' semer Patalong (Half Pant) semer aluyima lia aru, aser item chirtem aser semchirtem-ji tanü asenok lir. Ajisuaka, tanü asenok libaliroba jenjang ya akhi putu den medemdangra, 'Snake Game' nung number ka nungi tokür (1-90) jenjangi kaketa atuba amai lir.

Asenoki India lima talang kati moi asen anasa aliba Assamese nunger ya reprangdangra, parnok-bo Century ana-asem agi asenok dang nungi kanga agi tamasa nuchi akümba kin lir. Atangji par tetsü-tebou nunger Century ana-asem tashi nuchi kümer takar-sa lia aruba chirtem aser semchirtem lir. Aji oda, parnok iba jenjang nungji liaka parnok libaliro balaka 'Standard' nung aliba asenoki mangur. Parnok libaliro, chia-ajemba, subosolemstü, jembi-shinu yimya ajak nung balaka temelenshiba mali ajak den kasasa liromedema liteter. Parnokbo kechi kodakirnaka takar akümyongjia akhidang achiba chiyungtsü, akhidang agiba aben-suoshi to-sa agir. Ajisuaka, asen Naga nungerbo tera kaa-ita kümra khenyongi libaliro jenjang balaka melenshir. Asen Naga nungeri 'SEN' meteta akümba ya 1930's nung mezungbuba alima rara (1st world war) mapang, oboula nunger 'Tawa'-i aortem meyipa shilangdang parnok nem Britishi nungeri taa sen terara agütsüba aser Pension sen terara agütsüba, iba mapang nungi-ang asen Naga nungeri senji meteta amshia alitsü sudi. Surabangla, asen Naga nungeri 'SEN' meteta amshia arur ano Century ka tera majung asütsü sudi. Assam nunger-bo sen amshia arur aser takar sua lia arur Century ana-asem suiogo sudi. Anungji parnok o asenok naji kechisarena nung kecha apiteptsüla masü, saka parnok libaliroba den medemdangra asenok libaliroba ya kangasa taaktsüka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

New Jalukie Baptist Church nung pastor nem license agütsü



April 30, 2023 nü Peren district kübok New Jalukie Baptist Church nung pastor, Kendinbo Newmai nem License agütsüba sentong nung tangokba noksa nung angur.

Jalukie, April 30 (TYO): Association Executive Secretary, Rev. Kitanwi Chawang-i ketdangsi license agütsüba sentongji agi aser New Jalukie Baptist Church nung pastor, Kendinbo Newmai dang, license anguba mapa ya nüburtem ajurua parnok nüngdak reprangteta tanela chiyungtsü agi mesütsü aser Yisu sülen jungjunga anidakdaksütsü atema lir, ta ashi. LBA Executive Secretary, Rev. Kitanwi Chawang-isa Pastor Kendinbo dang, tanela temeshi nem len anidaksütsü aser Liangmai Baptist Association den longjemmer Arogotem ministry tashi itdaktsütsü atema inyaksü ayongzüka liasü.

Boston nung Khristan aikati SatanCon sentong anema longkak ait



April 29, 2023 nü Boston nung SatanCon sentong anema Catholic Khristanem Marriott Copley Place kima adenshir longkak aйдang tangokba noksa nung angur.

April 30, 2023: Hokolbarnü Boston nung SatanCon benjung tenzüka anema nisung aika adenshir longkak aitogo; Khristan karibo "Satan dak temeden kecha mali!" aser "Molumi longi atadar!" ta ozülu amer liasü. SatanCon tenzüka sülen küm 10 abensaba benjung ya Salem nung amenoka aliba Satanic Temple-i ayongzü. Hokolbarnü The American Society for Defense of Tradition, Family & Property nungi nisung 120 shi SatanCon sentong agiba kima adenshir sarasadema liasü. Honibarnüa Catholic Khristanem den külemi white nationalist group Patriot Front nungi züngsemtemi SatanCon anema longkak ait. SatanCon sentong tenzüka parnoki Laishiba ka shisaba sülen Khristanem aika iba sentong agiba tesem, Marriott Copley Place kima adenshir liasü. Boston nung tongti putiribo shidi ka ajanga Massachusetts nung Khristanem dang SatanCon sentong anema longkak aitba sentong tayongzü. Taküm SatanCon sentong omenji "Hexennacht in Boston," lir, koba tetezü "Arasenertem Aonung". SatanCon sentong ya Amongnü nikongdang tembangogo. Satan külemertem Boston nung SatanCon sentong agiba mapang nung Catholics aser Evangelical Khristanem aikati sarasadema mongogo. Intercessors for America nung chief program officer, Kris Kubal-i, SatanCon sentong nung adenertem temelung meyiptsü atema volunteer 500,000-i sarasademsütsü, ta metedakja liasü. Laisa, "Intercessors for America den külemi state tesem balala nung aliba telok aika longjemmer Boston atema sarasademsütsü; iba sentong anema masü saka parnok nem tesangwa ngudakjang ta sarasademsütsü," ta metedakja liasü. America nung tamangtir aikati, Tsüngrem leniba nung parnok-a Boston-i oa iba sentong nung adenertem den Khrista osang tajung lemsateptsü, ta metedakja liasü. Boston nung Intercessors For America (IFA) nungi Scotland tsür aianu ana- Suzie aser Lynn MacAskill nati, America tesem balala nungi aser denomination balala nungi Khrista dak amanger noklang aika longjemtsü aser satan sentongji agentsü atema masü saka iba sentong nungji Khrista tenü nung asentenshi milak adokdakjang ta sarasademsü, ta metedakja liasü.

ANOGO ABEN TSÜNGREM DEN

Kechiba asenoki Kibuba tenü ng asangtsüla?

T. Ken 100:5

Nisung shisatsü tematibaji tenü ng asangbaji lir. Kodang asenoki Tsüngrem tenü ngtem shisadangdir, Pa tenü ng asangtsüba dak alaka asenoki kecha inyaksü makok. Iba tekong nung Tsüngrem tenü ng asem indang jembir iba jagi Pa tenü ng asangtsü temsüa kümdaktsür.

Mezüngbuba, asenoki Pa ajungba angur. Tsüngremji tagütsünü aser temeim. Pa tekuru masü; Yisu ajanga Pai asenok dak menüremloktsür. Teyanglubatem nungi asenoki Pa ajungba angur (Lipok 1:31; T.Ken 33:5), nisungi aji raksar (Rom 8:19-23). Alima nung meküzmükba purtem danga Tsüngremi temeim sayur (T.M. 14:17). Pa tajungi nisunger tepela dangi anir.

Pa tajungi asenok anibelem nungi kümzüker (T.Ken 27:13). Pai asenok tasü itdaktsür (t.14). Tsüngremi asenok anishiner (T.Ken 25:8,9), aser kümzüknir (31;19,20). Asenoki Pa ajungba lemang asem nungi agizüksü akok: 1) Asenoki temulung meyiptsüla; 2) asenok Pa pelaa agizüksüla aser 3) asenoki Pa anasa aotsüla.

Tanabuba, asenoki Pa taochi angur (T.Ken 23:6). Kodang Tsüngrem taochi süidir, Pai asenok dak alangba temerenshi magütsür, koba asenok temenen asoshi teti tatem maka tasüba lir. Taochiji teti Pa yimya nung shilem ka lir (Ibri 4:16; 1Peter 1:3; T. Ken 107).

Tasembuba, asenoki Pa mulung lemtet angur. Iba yagi Tsüngremji atangji aser anokshitsü makok ta sayur (T.Ken 119:75). Asenok agizükba nung Pa temulung lemteta lir (1Kor. 10:13). Asen temenentem tai atoktsü Pa temulung lemtetta lir (1Yn. 1:9). Tsüngremi memelenshir (Ibri 13:8). Pa mapa ajak nung temulung lemtetta lir. Chirnur aser semchisemnur dang Tsüngremji tajung, taochi aser mulungtet lir ta sayuang.

Tajung, taochi aser mulung lemtet jagi Pa indang tali jungkai adoktsür. Nai Tsüngrem naroküm indang tali shisadang dang, nai Pa tenü ng tali asangtsü akok.

Congo linük nung ADF-i anogo ter tsüngda Khristan 80 tepset

April 30, 2023: Eastern Democratic Republic of Congo (DRC) nung Allied Democratic Forces (ADF) teloki maneni Khristanem anema inyakogo; parnoki Allah tsüngrem peladaktsütsü atema Khristan aika tepsettsü nangzüka lir, ta International Christian Concern (ICC)-i metedaktsü.

Anogo ter tsüngda Congo kübok North Kivu province nung ADF kiralongrar teloki Khristan 80 dak tema tepset aser noklang aika puer ogo. ADF telok ya Islamic State den tesendaktep aliba telok ka lir. Tesüba küm aika tsüngda ADF-i North Kivu province nung Khristan noklang aika tepsetba den aika puer ogo aser ibaji ajanga tesem nung nisung million aika jenshiogo.

Babwisi Parish nung tongti ketdangseri, "Yisu Khrista asüba aser tasü nungi shia aruba amongba sülenbo yimjung alitsü ta onoki imlaa liasü, ajisüaka April ita ya azü tokshiba ita ka liasü. April 7 nungi April 18 tashi nung West Oicha kübok Mavete, Musandaba, Katere aser Mamungelesi nung Khristan aika tepsetogo," ta metedaktsü.

Paisa, "Hokolbarnü, April 7 aser Honibarnü, April 8, 2023 Beni kübok Mavete aser Musandaba yimtsüng na nung ADF teloki Khristan 26 tepset. Parnok rongnung Babwisi Arogo nung züngsemtema liasü. Iba Arogo nungia züngsem 8 tepsetba ajanga amitsür aser tebu malir tanurtem aika kümogo," ta metedaktsü.

"Mongolbarnü, April 18 nü kasa ADF kiralongrartemi Katere aser Mamungelesi na nung Khristan 45 tepset; tetsür aser tanurtema an chanu ama tepset. Parnoki amakba mapang nung sayutsüngir, Emmanuel Kambale den pa kinüngtsü nata densema asü. Tang Arogoi jashi mangyimer. Iba dak alia nisung 30 dak tema puer ogo," ta pai metedaktsü.

"Katere aser Mamungelesi na amakba sülen anogo ana lir Katere nungi kilometer aika pilar tasü mang 9 angu, aser parnoki Mongolbarnü ADF-i puer aoertem liasü ta jangjaogo. Anungji Katere aser Mamungelesi na kija nung Khristan ajak senteper 54 tepsetogo," ta pai metedaktsü.

April ita nung anogo ter tsüngda Khristan 80 dak tema tepset aser aika puer ao. Puer aoertem aika Samboko ayong nung inoktsü aser parnok aika samar mangur. Arpil ita nung ADF teloki yimtsüng aika amakba ajanga nisung meyrjang aika jenshia anasa aliba jilatem- Oicha, Mbau aser Beni nung refugees ama jenoka lir.

Arogo ketdangseri takoksa angur kibongtem aser Oicha nung aliba lajartem akokba tashi yaritsü ayongzüko.

AO OSHI ANGAZÜKDAK:

TANÜ ANGAZÜKTSÜBA OJANG



Puinteter

(n) alima nung kechisarina indang shisateta bushiteter (scientist)

* Puinteter temi dang alima tejakleni anir.

Puipuir

(n) aut sentsü (ash color)

* Ozü kidang danü sentsü **puipuir** ka lir.

OLONG PAITEP # 6501

Grid for OLONG PAITEP # 6501 with numbers 1-24 in a 5x5 layout.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anungdang tesangwa - (3)
6. Apitet - (5)
7. Yagi jungdaktsür - (4)
8. Anogo semer ka - (3)
10. _ _ _ talsü - (3)
12. Tebur kidong aser zünga kasa tsungda jatepba - (4)
14. Pela agizükba tapu ka - (5)
15. Tenung atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6500 TELANGZÜBA

TIPIEN :

- 2. Pongsen, 5. Lepko, 7. Omen, 8. Maangka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nungdak, 10. Yongya, 11. Kongro, 13. Ora, 14. Ata.



2023 APRIL ITA LILI RESULT !

April ita nung Lili tajungtiba (First) shimteta tanü yangi lephsia agütsür. Lili zülur-i May 10, 2023 tashi nung Tir Yimyim Office nungi senpet agizüktsü mepishia metetdaksür.

ALOKBA O TEBU NA PRACTICAL INYAKER :

Tebui Alokba jar "yi agi koda tepseter", ibaji sayutsü atema glass ana bener arur, ka nung tzü aser ka nung yi züoker mesen ana bener aruagi glass ana nungji kaka inok. Tatsüka lir tzü glass nung aliba mesenji taküm ali saka yi glass nung inokba mesenjibo kitener süadok.

Tebu : Talak, iba yagi naia kechi angazüker?

Alokba : Oba ni jemra kümang nung aliba mesen ajunga südaktsür jangratema alitsü sayur ati.

Tebu : Oh Aloksangba!

Lilir : WhatsApp

Asür CM Dorjee Khandu sür küm 12 ajungba bilemtet

Itanagar, April 30, 2023

(Agencies): Taoba Arunachal Chief Minister Dorjee Khandu sür küm 12 ajungba anogo bilemteta tan mungogo.

Asür Dorjee Khandu dang "Laughing Buddha" ta aja aser April 30 nü pa asüba anogomung amung.

Dorjee ya March 19, 1955 nü aso aser April 30, 2011 nü helicopter lendong nung asü. Tawang district anasa Kyela aser Lobothang tsungda lendong atalok.

Pa ya Tawang district kübok Gyangkhar nung liasü. Pai education shitak mengutet aser Bhoti oshi nung Class VIII tashi dang azüing.

Ajisüaka pa ya temulung tajung aser sasapela nisung ka liasü aser Indian Army Intelligence Core nung küm 7 tema inyak. Bangladesh war nung pai shilem tajung agiba atema gold medal agüja liasü.

Dorjee-isa Tawang nung

alirtem ajangzüktsü asoshi lokti mapa balala inyak aser nübertemi pa kanga meima liasü.

1983 küm West Kameng Zilla Parishad nung district vice-president inyaka pai politics nung ajemok ajisüaka March 1990 nung Thingbu - Mukto constituency nungi pa den tetokteper shinga melii takok anguba ajanga pa politics nung jenjang ka alangteta liasü.

Iba sülen April 9, 2007 nü Dorjee-i Gegong Apang ket nungi Chief Minister inyaktsü melenzük. Maneni, October 25, 2009 nunga pa tanaben Chief Minister inyaktsü tezüngzüktep agia liasü.

April 9, 2007 nü Chief Minister inyaktsü tenzükba sülen mapang tatsüka tsungda nung pai NHPC nungi Rs 225 crore loan angu aser sorkar meyong APEX Cooperative bank tanaben lapok.

Paisa Centre sorkar dang Itanagar nung FIC regional head

asur godowns lapoktsü rongshi aser iba ya PDS commodities nung tim masüba agientsü atema liasü.

Asür Khandu-isa Arunachal Pradesh nung Defence System tiptema ayutsü aser AFSPA liaka civilian tem shisabulu mesüdaktsütsü atema mapatem inyak.

Paisa Airports, Railways, Pawan Hans chopper service amala tongtipang mapatem tenzük aser secretariat office, assembly building aser Chief Minister Bungalow tasentem yanglutsü tenzüktsü.

Ajisüaka, April 30, 2011 nü kanga dang ajungbena helicopter tsükokdang Dorjee Khandu asü.

Pa den külemi nisung pezü mener Tawang nungi Itanagar-i apuso saka helicopter mangu aküm. May 4, 2011 nü Sela Pass nungi kilometer 45 shi pilar Sajula nung yimdaklirtemi helicopter tsükoka aliba angu.

MOVCD-NER kübok integrated processing unit lapok

Imphal, April 30, 2023

(Agencies): Manipur Chief Minister N Biren Singh-i fruits aser spices indang integrated processing unit ka lapoktsüogo.

CM Biren Singh-isa Fruit Preservation Factory (MAGFRUIT), Food Park, Nilakuthi nung natural & organic products yangluba reprangdanga liasü.

Taküm küm tetenzüklen Union Home Minister Amit Shah-i Manipur semdangdang iba factory lapoktsü.

"Iba factory ajanga top-quality ginger aser turmeric products yangluba atema pelar"

ta pai ashi.

"Food Park, Nilakuthi nung Mission Organic Value Chain Development for North East Region (MOVCD-NER) kübok integrated processing unit lapoktsüogo. Manipur nung micro, small, and medium enterprises (MSMEs), private sectors kanga renlokogo" ta CM Biren-i metetdaksü.

Central aser State sponsored schemes balala ajanga renloker aser asenoki tangar dang nungi teyari magiba state ka akümtsü lenmang nung jajadar. Iba ajanga linük renlokba nung shilem tulu agitsü, ta pai ashi.

"Food Park, Nilakuthi ya entrepreneurs ajak atema lir. Onok iba tesemi aruba atema kanga pelar aser asenok ajak longjemer Manipur tajungba kümdaktsüdi" ta Biren-isa ayongzük.

MOVCD-NER ya Central Sector Scheme ka lir aser iba ya Ministry of Agriculture and Farmers Welfare ajanga tenzükba National Mission for Sustainable Agriculture (NMSA) kübok sub-mission ka lir. Iba ya Arunachal Pradesh, Assam, Manipur aser Meghalaya state tem renloktsü atema tenzükba lir.

Lok Sabha election matong tashi Assam cabinet memelenshitsu

Guwahati, April 30, 2023

(Agencies): Sangküm Lok Sabha elections magi tashi state cabinet nung temelenshi kecha malitsü ta Assam Chief Minister Himanta Biswa Sarma-i ashi.

"State sorkar küm ana abensaba tenung nung anogo asemnü sentong ka ayonga agitsü aser idangi Rs 10,000 crore atema investors balala

den MoU nung sign süteptsü" ta CM Sarma-i ashi.

"May 9 nungi 11 tashi Assam nung mapa balala inyaktsü atema Rs 10,000 crore indang MoU nung sign süteptsü. Iba dak alia Bihupuria nung Madhavdev Kalakshetra aser Mukhyamantri Ayushman Yojana tenzüktsütsü" ta paisa ashi.

May 11 nü state nung lanur meyirjang 45-50 tashi nem appointment letters agütsütsü ta paisa metetdaksü.

"Assam sorkar küm ana ajungba anogo nung May 11 nü nisung lakhl 1 nem appointment letters agütsütsü" ta Sarma-isa ashi.

Iba sentong nung Union Home Minister Amit Shah adentsü ta paisa shisem.



April 29, 2023 nikongdang Nabam Namdek-i Miss Arunachal 2023 takok korang nguogo. Namsai district nung Miss Arunachal beauty pageant 2023 indang sentong nung Rachel Aran-i tanabuba jenjang aser Ibi Kena-i tasembuba jenjang takoktem angu. Iba sentong ya Miss Arunachal Organization-i Arunachal Guild for Cultural Integration (AGCI) kübok ayongzük aser Department of Youth Affairs-ia teyari agütsü. Sentong nung Arunachal Chief Minister Deputy Chief Minister Chowna Mein-i tongti tesemdanger ama shilem agia liasü.

Sudan nung Army aser RSF tsungda rara manenteter



Sudan nung sepai tanishir ana tsung ceasefire atsulangaka maneni injang-bomb ola angshir aser linuk yimtiba Khartoum nung nuburtem totzu alitsü adenshia aliba noksa nung angur. Tashi agi raktepa army aser paramilitary tsungta raradang nisung noklang aika takum samaogo aser meyirijang aika pei takum kumzüksü mechi tesem balalai ajener.

Khartoum, Rongchii/April 30 (Agencies): Sudan yimtiba, Khartoum nung rara tesashiba kumogo, anungji nuburtem tekumzük bushia jena odaktsütsü nukjidong nung tesüsa ceasefire benokba tamakok ajurua lir.

Deobarnü army temi ashiba agi, paramilitary tem meindoktsü asoshi parnoki tesem ajaklen nungi tayimtsü aser artillery tulutem amshia yimti amaker.

Ceasefire ya Deobar aonung ayatirm nung tembangtsü liasü. Nisung million aika linuk yimtiba nungi mainshiteti lir, kong chiyongtsü tagimar.

Teyari osettem aser talisa medical oset bena aliba tayimtsü ka Sudan tonga aruogo.

International Committee of the Red Cross (ICRC) ajanga ashiba agi, mozüki atema health kits densema teyari oset tonne ti aliba tayimtsü ka Port Sudan

nung anenogo. "Rara manener asünung Khartoum ama tanen makai rara aliba tesemtem nung medical oset agütsütsü atema telok ajaki melatsüla," ta ICRC sangdong ka ajanga ashi.

April 15 nü rara tenzükba sülen link yimtiba nung aliba mozüki shilem 70 dak tema shibangogo.

Nisung 500 dak tema tepsetba osang lir, saka asangsang nung asüba aser yirur aliba ya kanga agi timba asütsü.

Rara ya army aser paramilitary Rapid Support Forces (RSF) tsungda lir.

Army commander Gen Abdel Fattah al-Burhan aser RSF tekolakba Gen Mohamed Hamdan Dagalo na tashi agi rakteper aser army nung RSF anioktsü asoshi sentong balaka yangluba nung obang mapur.

Bendang linuk temi pei senso anizüker aoba maparen tenzükogoo.

Kidanger linuktem, US, UK aser UN ajanga kanga meranga jembiba sülen Brehotibar aonung ceasefire atsulangtsü renema liasü. Saka ghonda 72 atsulangtsü pangjemba ama meinyak.

Honibar nikongdangbo Khartoum nung kanga sashia rara tenzükler liasü. Army temi yimti north tsütsü RSF anema operation agi, ta ashi.

UK sorkari par senso anizüker aoba maparen Honibarnü tembangogo. Foreign Office ajanga ashiba agi, tayimtsü tatembangba Khartoum nungi aonung 10:00 ako (par mapang) nung ayameso aser nisung 1,900 jungnüa anir ogo.

US sensotem rong ajanga Saudi Arabia nung aiba Jeddah-i anir aotsü asoshi ketdangsurtem Port Sudan tonga lir. America nung noklang aika ainshiogoo aser diplomats tem hopta ka tejakdang tayimtsü nung anir ogo.

Russia indang Wagner sepaitemi Bakhmut nungi ainshitsü amokmerener

Moscow, Rongchii/April 30 (Agencies): Russia indang Wagner mercenary force tekolakbai Ukraine anüdoklen Bakhmut asoshi raraba tongpang nungi par sepaitem anizüker aotsü amokmerener, kechiaser par sepai jenti asür, aser külen Russian sepaitemi iba yimti nung nungdakba oset belenba lenmang menokdangteter, ta Ukraine mitkar ketdangsur temi ashi.

Prangbong tulu atema injang peria maliba yong Bakhmut nung takoksa ya nungdakba dang ponguben agi tali lir, ta Wagner tekolakba Yevgeny Prigozhin-i Russian military blogger Semyon Pegov den sensaksemba Honibarnü adokja liasü.

"Anogoshi onoki nisung tasümay meyirijang dak tema bendena süngden nung inoker kidangi yoker," ta Prigozhin-i ashi.

Prigozhin-i ashiba agi, akok tashi tekeraba nung injang yoktsü atema Russian Defence Minister Sergei Shoigu dangi pai zülüogo.

"Injang nungdakba ama magütsütetra yasür onok tasü mait koya ama jenshia

mesenzütsü mechi meyiba aotsüla mesüra asütsü," ta pai ashi.

Bakhmut nungi item sepaitem karbo ainshitsü akok, saka iba yagi tesem kar nung Russian front line laotsü, ta pai tekumdangtsü ashi.

Pa indang press service indang Telegram messaging app nung Honibar nikongdang prokshiba audio statement ka nung, injang peria maliba agi par sepai 94 takum samaogo, ta Wagner tekolakbai ashi.

"Onok ket nung injang tali liasü asübo asüba ya ponguben agi tajemba lila," ta Prigozhin-i ashi, shibai taoba mapanga Russia indang 'regular armed forces' temi par sepaitem nem nungdakba ama injang peria magütsür ta tai tonglokja liasü. Russia lenirtemi ashiooktsür, ta pai taoba mapanga shia liasü.

Ukraine mitkar indang odongtar kati Honibarnü ashiba agi, Russian sepaitemi Bakhmut nung Ukraine sepaitem indang supply line tem menokdangteter.

Washington, DC nung amenoka aliba Institute for the Study of War ajanga ashiba agi, Wagner tekolakbai Russia indang Ministry of Defence

dang anogoshi injang tulu 4,000 meshi saka 800 dang agütsür.

Institute ajanga ashiba agi, Ukraine-i meyiper amaktsü mapang talangka nungi ataa aliba May 15 matongdang tenzüktsü saka iba atema Russian sepaitem renema alitsü mariteper ta Prigozhin-i sasaba ashi.

Mapang ka nisung 70,000 aliba Bakhmut yimti telungi Russian sepaitem aitsü ita ter shi meranga arur. Bakhmut nung tanen makai rara aruba dang "meat grinder" ta ajar, kechiaser yangji asü-amaba jenti lir.

Russian sepaitemi Bakhmut aser antiolen tsütsü mile ter shi pilar Chasiv Yar jila sendaktepa aliba lenmang menokdangteter, koba dang "road of life" ta ajar.

Bakhmut nung Ukraine sepaitem asoshi iba lenmang ya ajanga nok-nü, injang aser bomb aser nungdakba osettem belener aser Ukraine sepaitemi iba lenmang ya kanga junga anepalua anüker aser engineer temi ano lenmang tasen yangluogo.

Bakhmut yimti ya Russia nung nem rakzükdaktsüra, parnoki Chasiv Yar jila aser danga tesemtem amak tenzüktsü.

Menungra Bilemteter



ASO :
5/04/1944

ASÜ :
01/05/2022

Lt. Mrs. TSUKNUNGLEMLA (UNGMA)

Nübener tetsü, Nai onok toktsür orr tanü anogo küm ka ajunger, saka ne tesungjem, taremsük aser temeim onoki mamadokteter aser tanüa onoki menungra rongjenseta sarasadema Tsüngrem tenüng sanga amonger. Kenü anogo Tebu langpang tsüngdang asenok tanaben ajuruteptsü, ya onok tamang sarasadem.

Temeim Kinungbo, Chirnür, Semchir aser Kinunger.

Iraq nung America nungger kajia tali lir: Khamenei

Tehran, Rongchii/April 30 (Agencies): Iran nungger lenirtem rongnung tongtiba Ayatollah Ali Khamenei-i, Iraq tir Abdul Latif Rashid dang, Iraq nung America nungger tejang ka danga alibaji sashira, ta ashi.

Lenir ana ya Honibarnü Tehran nung ajuruteper, koba Rashid atema taoba October ita election nung takok anguba sülen linuk tekolak ama Iran semdangba mezüngbuba liasü.

Rashid-isa, tir Ebrahim Raisi aser parliament speaker Mohammad Bagher Ghalibaf na den ajurutepe senden menogo.

"America nungger ya Iraq nungger tembar masü," ta Khamenei-i ashiba pa indang official website sangdong ka ajanga metetdaksü. "American nungger shinga dena tembar masü aser parnok Europe nung aliba tembartem dena tesendaktep junga mali."

Iraq nungi America nungger aritoktsü atema ashiba den Khamenei-isa, Iraq renloka aotsüji Iran atema kanga tongtibang lir aser taoba ita security aser rongsenketzüng dak sendakba nung tenanzüktepeba yanglur aliba ajunga benoka inyaksangshitsü kanga tongtibang ta ashi.

"Iran aser Iraq na tesendaktep tajungba küma meyanglushidaktsü nüba tsükchir tashi tait lir aser puti otsü aser linuk ana tsüngda kati ka dak tamang katepa tesendaktep meyanglura linuk ana tsüngda tesendaktep ya Saddam [Hussein] yimsüsüba mapang tesendaktep mejangi aliba ama akümtsü akok," ta pai taoba Iraq tir shiba 1979 revolution sülen Iran maka liasü, pa indang tashitsü amshia jemi.

Kasa mapang nung Rashid-ia, par sorkari Iran den tesendaktep akangshitsü asoshi merangtsü aser mangatettep aliba bentetner, ta ashi.

Honibarnü Iraq tir ya Iran tir Ebrahim Raisi-i Tehran kübok Saadabad Palace nung agizük kong tena sensaksem aka aser iba sülen osangbenertem den sensaksemba liasü.

Rashid-i ashiba agi, taoba kümtem tsüngda Iraq jenjang

kanga mejungi aliba mapang Iran-i teyari agütsüba kodanga mamatoktsü ta ashiba den, linuk ana yagi water rights ken o süoki ia agitsü nungdakba aser linuk ana temeket nung temesepba mozü shibelenba anema raratsü asoshi rangloker inyaksüla ta ashi.

Iraq tir-isa, Iran aser Saudi Arabia na tesendaktep yanglushitsü atema mulungtepba pelashishia agizükogoo aser ashiba agi, iba ajanga parnok meketa aliba tesemtem tamendakdak aser security tali akangshitsü.

Raisi-isa, energy belentsü asoshi kidanger linuk ana maneni longjemer inyaksü aser Iran aser Iraq naprongla nungdak meperi tashi rongsenketzüng dak sendakba nung maneni renlokyonga aotsü, ta ashi.

Taoba küm November ita Iraq Ato Kilonser Mohammed Shia al-Sudani-i Tehran semdanga Khamenei aser Raisin a den ajurutepe liasü. Tang Iraq yimsü süa aliba lenir tejentem rongnungi pai mezüngbuba Iran semdanga liasü.

Mohammed-i Iran semdangba mapang security ken o aser talisa parnok indang arrtsü ya Iran nungger litsü nung security jenjang raksatsütsü asoshi Kurdish nungger timba aliba tesemtemi mamshidaktsütsü sentong yangluba dak sendakba nung Khamenei-i pa kanga mejungi aija liasü.

Taoba küm Islamic Revolutionary Guard Corps (IRGC)-i missile, drone aser artillery amshia Iraq anütoktiplen Kurdish teloktemi amokbanger aliba tesemtem makogoo. Item teloktem ya Iran-i kiralongrarterem ama züngshir.

September ita arishi küm 22 tain Kurdish tsür Mahsa Amini police ket nung yur aliba mapang asüba sülen Iran nung longkak ait tezüka sülen item tesemtem maka liasü.

Iran nungger ketdangsurtemi ashiba agi, iba mapang Kurdish teloktemi Iraq nungi prangbong hadir shibelenar arua Iran nung inyaksangshia liasü.

Delhi Police-i tashishiba benokba wrestler 7 nem tekümzükba agütsü



Jantar Mantar, New Delhi nung wrestler Bajrang Punai, Videsh Phogat aser Sakshi Malik nungeri osangbenrtem den sensaksemba noksa nung angur.

Rongchii/April 30, 2023

(Agencies): Delhi Police-i, WFI tir, Brijbhushan Sharan Singh anema tashishiba abenokba tetsür wrestler tenetprongla nem security agütsüogo.

Supreme Court-i Delhi Police dang Singh anema tashishiba benokba wrestler tem nem security agütsüsa atema tetuyuba agüja liasü.

Delhi Police-isa, tetsürtem dang bushisingdang nung shilem agütsü jaokba den parnok indang 161 CrPC statement mangaoka ayutsü shiogo, ajita asünungdang parnoki taruba jenjang agütsü asoshi telemtetba agitetsü.

Source-i ashiba agi, anogo ka ana tsüingda tetsür wrestler tem Delhi Police indang Connaught Place Police Station-i arua parnok indang statement tem

mangaoka ayutsü.

Honibarnü Singh anema benokba FIR rongnung ka indang copy ka Jantar Mantar nung longkak aita aliba wrestler tem nem agütsüogo.

Ajisüaka Protection of Children from Sexual Offences (POCSO) Act kübok benokba FIR indang copy bo wrestler tem nem magütsü, kechiyong iba yabo tetsür laer kinunger nem agütsüsa, ta police-i ashi.

Police ketdangsür tejen kati ashiba agi, parnoki yakta tetsürtem indang statement tem mangaoka ayutsü.

Hokolbar nikongtsütsü police-i, tetsürtemi tashishiba benokba dak ajemdaker WFI tir anema FIR benoka liasü.

Wrestler temi mezüing January ita wrestling federation kübok temaba jenjang nung temelenshi bener arutsü atema

longkak ai, ajisüaka sports ministry-i parnok nem tenangzükba agütsüba sülen anena liasü.

Nüingtugu boxer MC Mary Kom lenisüba nung oversight committee ka tentetsü aser parnok nem WFI achaayangtsü aser Brij Bhushan Singh anema ken o benokba bushisingdanga osang agütsüsa asoshi nongloktsü.

Brij Bhushan anema tetsür teneti ken o benokka police-i FIR mebenokba sülen Linük nung nüingtugu wrestler tem rongnung Olympic medallists Bajrang Punia, Sakshi Malik aser Commonwealth triple gold medallist Vinesh Phogat nungeri anir taoba Deobarnü nungi ano longkak ait tenzük.

Ajisüaka Supreme Court-i tetuyuba agütsüba sülen FIR ana benokgo.

Rankireddy & Chirag nati Badminton Asia Championships kokogo



Rongchii/April 30, 2023

(Agencies): India nunger tebur tarep asayar Satwiksairaj Rankireddy aser Chirag Shetty nati Deobarnü Malaysia nunger tarep Ong Yew Sin aser Teo Ee Yi na 16-21, 21-17, 21-19 agi koka Badminton Asia Championships gold medal nguogo.

1965 küm Dinesh Khanna-i Badminton Asia Championships nung final tonga asayaba sülen India nunger asayartem rongnungi Satwik-Chirag nati mezüingbuba final tonga asaya liasü. Quarterfinals nung tenati Indonesia nunger tarep Mohammad Ahsan aser Hendra Setiawan na 21-11, 21-12 agi koka medal kabosa angutsü

jangjar liasü.

Satwik aser Chirag nati iba asayamung nung India atema tanabuba gold medal nguogo. Dinesh Khanna-i goal medal anguba dak alia India nunger asayartem jenjang balala nung 1962 küm nungi tang tashi nung bronze medal 17 ngua lir. Satwik aser Chirag nati Tokyo nung 2022 World Championships nunga bronze medal nguogo aser Asian Team Championships (2016, 2020) nunga bronze medal ana ngur lir.

Asian Badminton Championships nung gold medal anguba ya tena atema tang tashi nung medal tongtibangtiba asütsü. India nunger tarep yagi

BWF World Tour nunga asayamung pongu kokogo aser anaben tashi tanabuba jenjang nung tembangogo.

Semifinal asaya nung Tokyo Olympic champions Chinese Taipei nunger tarep Lee Yang aser Wang Chi-lin na tanabuba game asaya tom nung masayatetsüsa akümba sülen India nunger tarep ya final-i ai.

Semifinal asaya nung Chirag aser Rankireddy nati mezüingbuba game 21-18 agi akok aser tanabuba game nung point 13-14 ta ngur aliba mapang Lee Yang aser Wang Chi-lin na masayatetsüsa aküm.

India nunger tarep yagi iba asayamung nung mezüingbuba asaya nung Malaysia nunger tarep Tan Kian Meng aser Tan Wee Kiong na 21-14, 21-17 agi akok aser round of 16 nung South Korea nunger tarep Jin Yong aser Na Sung Seung na 21-13, 21-11 agi koka liasü.

Quarters asaya nung tenati Indonesia nunger tarep Mohammed Ahsan aser Hendra Setiawan na 21-11, 21-12 agi koka liasü.

Barcelona-i goal 4-0 agi Betis koka La

Liga abentsü jenjang junga kümogo

Rongchii/April 30, 2023

(Agencies): Andreas Christensen, Robert Lewandowski aser Raphinha nungeri goal idakja Barcelona-i goal 4-0 agi Real Betis madak takok nguogo aser LaLiga title 27buba abentsü asoshi jenjang ka tejakdangi tuogo.

Asaya trok asayatsü anunga lia, Barca pur hopta teyong nung Rayo Vallecano makokba nungi meyipa arur tang point 79 jungogo aser parnok tanabuba jenjang nung aliba Real Madrid dang nungi point 11 agi timba kümogo. Betis puri point 49 nguteta tang trokbuba nung lir.

Barcelona asoshi mezüingbuba goal ya Raphinha-i agütsüba ball ka Christensen-i kanga junga tongokja liasü.

Kasa mapang nung asaya nung minute 12 orr aliba mapang Luiz Felipe yiruba ajanga Betis defender Edgar Gonzalez ait, ajisüaka pa minute 21buba nung tanabuba yellow card chia tugudaktsüba ajanga Barca asoshi asaya ayonga aküm.

Iba sülen asaya mezüingbuba shilem metembang tsüingda minute asem tsüingda Lewandowski aser Raphinha natia goal kaka idakja liasü.

LaLiga nung goal timtiba idaktsür aliba asayar Lewandowski-i (19) minute 36buba nung Jules Kounde-i agütsüba ball ka idaktsü aser iba sülen minute ana lir Raphinha-i goal tasembuba idaktsü. Pai idaktsüba goal ya mezüingbo offside asüba ajanga referee-i magütsü, ajisüaka VAR asadanga sülen goal agüja liasü.

Asaya tanabuba shilem nung Barca puri maneni kanga junga asaya aser defender Guido Rodriguez-i own goal ka idaktsüba sülen Barca puri iba asaya goal 4-0 agi ayong ayonga koka liasü.

Asaya akoktsü jangja akümba sülen coach Xavi-i arishi küm 15 tain winger Lamine Yamal anioka asayadaktsü aser pa ya Barca nungi asayar tanobusang kümogo.

Sumit Nagal-i Rome Challenger asayamung kokogo



Rongchii/April 30, 2023

(Agencies): Küm pezü tashi Challenger title ka danga mekoki arur Sumit Nagal-i Deobarnü Rome Challenger (ATP Roma Garden Open) kokogo. Iba asayamung tebur kija asaya final nung pai Jesper De Jong 6-3, 6-2 agi koka liasü.

Pa iba asayamung nung qualifiers ajanga ait aser anogo ti nung asaya tenet asaya liasü ajisüaka final asaya nung rank 347 nung aliba India nunger asayar yagi kanga junga asaya-a world No. 234 Dutch nunger asayar ya koka liasü.

Hopta tepeyong pai set ana dang makok aser pai 4th seeded Italy nunger asayar Francesco Maestrelli (world No. 172) aser 8th seed Joris De Loore (198) nunger koka final tongteta liasü.

Iba asayamung akokba sülen pa ATP rankings nung jenjang 100 tejakdangi tua 254bubai atutsü imlar. Pa 2020 küm ATP ranking nung jenjang 122buba tongteta asayaogo. India nunger

asayartem rongnungi Ramkumar Ramanathan-i tatemsa Bahrain nung 2021 küm November ita kija asaya ka koker liasü.

Arishi küm 25 tain Nagal-i tang agi Challenger title tasembuba benogo. Pai mezüingbuba Challenger asayamung ya 2019 küm September ita Buenos Aires nung koka liasü. Iba sülen Nangal ya Somdev Devvarman sülen Grand Slam kija asaya ka akokba mezüingbuba asayar aküm. Pai 2020 US Open nung asaya ka koka liasü, iba sülen pa 2021 küm tatemlen surgery agiba ajanga ita trok tashi masayateti liasü.

Pa yirur mapang talangka masayatetba ajanga pa asaya yimya dak kongshia liasü. Ajisüaka pa ATP 250, Pune aser taküm Denmark den Davis Cup asayaba mapang pa tajungba asayaba nguogo aser February ita Chennai Challenger nung semifinal tonga asaya liasü.

BILEMDANGANG

"Pei maitsü jangjatsü atema sobalibaji tenüngdaktsü."